

ARAITZ ZUBIMENDI - HARITZA GALARRAGA, SEGI-KO KIDEAK



GARI GARAIALDE

«Espainiako Estatuaren jopuntuan dago Segi, bere proiektu politikoa kaleratu orduko»

Segi gazte erakundea joan den larunbatean sortu zen Iruñean, 300 gazte bildu zituen nazio batzarrean. Nazio eraikuntza prozesuari egin diezaioketen ekarpenik onena gazte mugimendu nazionala osatzea dela iritzi diote.

Axun Erzibengoa | DONOSTIA

Segi gazte erakunde berriaren nondik norako nagusiak azaldu dizkigute bi gazteek.

■ **Zerk ekarri du Segi-ren sorrera?**

Araitx Zubimendi: Euskal Herrian badago errealtate bat, errealtate bizi bat, euskal gazteria, historikoki arlo kultural eta sozialetan islatu dena. Hortik abiatuta tresna nazionalak sortzearen beharra ikusi zen errealtate hori biltzeko. Hor kokatu zen Haikaren sorrera, eta Espainiako legeria aplikatuz lege kanpo jarri dutenean hutsune bat gelditu da. Hutsune horri erantzutera dator Segi, gazteria oso errealtate bizia delako, eta Euskal Herrian independentzia eta sozialismoaren aldeko gazte andana dagoelako.

■ **Segi, erakunde nazional, independentista, sozialista eta iraultzaile gisa definitu duzue. Zeintzuk dira helburu nagusiak?**

A.Z.: Nagusiki hiru funtzio ikusten ditugu. Batetik, Euskal Herria nazio eraikuntza prozesu

batean dagoela ikusirik, gazteon ekarpen nagusia gazte mugimendu nazional eta euskalduna sortzea dela uste dugu. Gazte mugimenduak erakutsi behar du bere eraginkortasun soziala, gazteon arazoei aurre egiteko. Bigarrena, eta oso garrantzitsua, gaurdanik independentzia eta sozialismoaren inguruko indar metaketa bat ahalbidetzea, arloz arlo borrokan ari diren gazteei alternatiba globala eskaintzeko. Azkenik, tresna nazionala denez, partizioaren kontrako jarduera etengabea egin behar du Segik.

Haritza Galarraga: Segik une honetan betetzen duen funtzio nagusietako bat da Euskal Herri osokoa izatea.

■ **Erakundearen egituraketa zer zehaztu dezakezue?**

H. G.: Irizpide nagusienetako bat da herrietatik ateratzen dela Segi. Osaketa lana ildo horretatik ikusten dugu, herrietan dauden hainbat borroka defenditzen dituzten pertsonak talde-tan banatzen ditugu.

A.Z.: Iruñean 300 lagun bildu ginen, baina haiek ziren Gazte

Bilguneak deitutako prozesuaren ordezkariak. Errealitatea askoz ere zabalagoa da, eta herrietan eman den eztabaida askoz ere aberatsagoa izan da. Lan ildoena, berriz, herriak oinarri dira, baina nazional mailako beste lan talde batzuk ere badauzkagula. Naziotasunaren ingurukoak, bizi baldintzena, drogena, irakaskuntzarena eta oinarri demokratikoena.

■ **Haikarekin gertatutako kontutuan hartuta, zuen jarduna nola eramango duzue aurrera?**

A.Z.: Bi estatuak, baina kasu honetan bereziki Espainia faxismoaren adibiderik gordinena da. Antolakuntza edo proiektu politiko jakin bat izateagatik lege kanpo uzten gaitu Estatu horrek. Raxoik esan zuen lehengo egunean Segiren sorrera burla bat dela. Segik ez du apenas ibilbiderik izan, eta dagoeneko beraientzat mehatxua da. Bere proiektu politikoa zein den besterik ez du esan eta jada Estatuaren jopuntuan dago. Horren inguruan gure apustua eta lehenetasuna izango da gure lan il-

doekin aurrera jarraitzea. Guk gure jardura publikoan jarraituko dugu nazio eraikuntza prozesuan gure ekarpena eginez. Baina horrek ez du kentzen inolabait Estatuaren erasoaren aurrean gure burua defenditu behar ez dugunik, gogoeta bikotiz litzateke, batetik lan ildoekin aurrea jarraitzea, eta bestetik erasoei aurre egitea.

■ **Arriskua ikusten duzue beraz.**

A.Z.: Bai, baina ez gurea bakarrik, ezker abertzale osoarena

ASMOAK

«Gure jardueran ariko gara lan ildoak landuz, baina erasoak ahaztu gabe»

ERASOAK

«Segik, ezker abertzalearekin batera bilatu behar du modua erasoei muga jartzeko»

eta herri mugimenduarena ere. Horregatik uste dugu Segik ezker abertzale osoarekin batera errepresioari topeak nola jarri asmatu behar dugula, estatu espainiarrarentzat ez dadin doako izan sekulako sarraskiak egitea. Guk argi dugu eraso horien helburua dela ezker abertzalea ahultzea, horrela nazio eraikuntzaren prozesua baldintzatzea.

H. G.: Arriskua hor dago, baina horrek agerian uzten du Euskal Herrian gazte mugimendu bat osatzeko emaniko pausoak zuzenak direla, min handia ematen die. Oraindik ez dugu pankarta bat sinatu Segiren izenean, eta jada erasoak datoz.

■ **Gainerako gazte erakundeekin elkarlana lantzeko asmorik baduzue?**

H. G.: Haikaren aurkako erasoak gertatu zenean jada gogoeta egin genuen, eta pentsatu beste erantzun mota bat behar zela. Bide horretan gure asmoa litzateke Gazte Kontseilu bat eratzea, ez soilik euskal gazteriak pairatzen dituen erasoaren aurrean erantzun bat emateko, baizik beste babes sozial bat izateko arazoaren aurrean.

A.Z.: Gazteriak ere tresna instituzionalak ere behar ditu, beraien alde lan egingo dutenak. Guk beste gazte batzuekin lehenetasun hori ikusten dugu, gazteen parte hartzea ahalbidetuko lukeen Gazte Kontseilua osatzea Euskal Herrian.



Eros ezazu urtebetean interesik gabe J. Bengoa

Bulebarreko arkupeak, 20 DONOSTIA
Mamut musika zentroa OIARTZUN